

Embargo: Hanya boleh diterbitkan atau disebarikan mulai jam 1200, Khamis, 10 Julai 2025



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAN GETAH BULANAN, MALAYSIA

MEI 2025

Pengeluaran getah asli Malaysia meningkat 24.9 peratus pada Mei 2025

PUTRAJAYA, 10 JULAI 2025 – Jabatan Perangkaan Malaysia (DOSM) telah menerbitkan **Perangkaan Getah Bulanan, Malaysia, Mei 2025**. Penerbitan ini memaparkan statistik pengeluaran, import, eksport, penggunaan domestik, stok, harga, bilangan pekerja, gaji & upah dan produktiviti bagi estet getah.

Ketua Perangkawan Malaysia, Dato' Sri Dr. Mohd Uzir Mahidin berkata, pengeluaran getah asli meningkat 24.9 peratus pada Mei 2025 (22,494 tan metrik) berbanding pada April 2025 (18,008 tan metrik). Perbandingan tahun ke tahun menunjukkan pengeluaran getah asli menurun 12.2 peratus (Mei 2024: 25,608 tan metrik). Pengeluaran getah asli Malaysia pada Mei 2025 disumbangkan terutamanya oleh sektor pekebun kecil (85.4%) berbanding sektor estet (14.6%).

Jumlah stok getah asli pada Mei 2025 menurun 11.4 peratus kepada 180,569 tan metrik berbanding 203,708 tan metrik pada April 2025. Kilang pemproses getah menyumbang stok akhir sebanyak 86.1 peratus diikuti kilang pengguna getah (13.7%) dan estet getah (0.2%).

Eksport getah asli Malaysia berjumlah 35,939 tan metrik pada Mei 2025, meningkat 0.1 peratus berbanding April 2025 (35,901 tan metrik). China terus kekal sebagai destinasi utama untuk eksport getah asli iaitu menyumbang 31.7 peratus daripada jumlah keseluruhan eksport pada Mei 2025 diikuti Jerman (15.8%),

Emiriah Arab Bersatu (14.0%), Amerika Syarikat (8.1%) dan India (6.6%). Prestasi eksport disumbangkan oleh produk berasaskan getah asli seperti sarung tangan getah, tayar, tiub dan benang getah. Produk sarung tangan getah merupakan eksport utama dengan nilai sebanyak RM1.04 billion pada Mei 2025, menurun 3.5 peratus berbanding April 2025 (RM1.07 billion).

Analisis perbandingan harga purata bulanan menunjukkan Lateks Pekat merekodkan penurunan iaitu 5.2 peratus (Mei 2025: 613.80 sen sekilogram; April 2025: 647.20 sen sekilogram) manakala Sekerap menurun sebanyak 5.4 peratus (Mei 2025: 606.67 sen sekilogram; April 2025: 641.27 sen sekilogram). Trend harga bagi semua jenis Getah Mutu Malaysia (G.M.M) pula menunjukkan penurunan antara 3.2 peratus dan 5.1 peratus. *The World Bank Commodity Price Data* melaporkan harga bagi getah jenis TSR 20 (*Technically Specified Rubber*) menurun 0.2 peratus daripada USD1.71/kg kepada USD1.70/kg dan SGP/MYS (Singapura/Malaysia) meningkat 3.3 peratus daripada USD2.13/kg kepada USD2.19/kg.

Menurut *Malaysia Rubber Board Digest* keluaran Mei 2025, Pasaran Getah Kuala Lumpur menunjukkan aliran menurun sepanjang Mei 2025, disebabkan oleh penurunan dalam pasaran hadapan getah serantau, penanda aras harga minyak mentah yang lebih lemah dan pengukuhan nilai ringgit berbanding dolar Amerika Syarikat. Sentimen negatif juga didorong oleh kebimbangan berhubung tarif perdagangan Amerika Syarikat dan ketegangan yang meningkat di Timur Tengah, seterusnya meningkatkan ketidakpastian ekonomi global. Namun begitu, kerugian seterusnya dikekang oleh prospek permintaan yang lebih cerah seperti dilaporkan oleh Persatuan Negara-negara Pengeluar Getah Asli (ANRPC) serta peningkatan dalam prestasi ekonomi China.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Carta 1: Pengeluaran dan penggunaan domestik bagi getah asli Mei 2024, April - Mei 2025
(‘000 tan metrik)



Carta 2: Import dan eksport bagi getah asli Mei 2024, April - Mei 2025
(‘000 tan metrik)



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
10 JULAI 2025